

## Mbunda - Munzinzime Nzita Visoneka - Spiritual Warfare Intro Scriptures

Luka 17:5 Co miluwa vendekele kuli Mwene ngwavo, "Wezelela kukulaela kwetu." Loma 10:17 Ngecivene, kukulaela kutunda akuziva, co kuziva kutunda akwambulula Kilstu.

Luka 11:1 Litangwa limo Yesu wakele nakulombela ku mutambela umo. Co omo wamanesele umo wa vandongisi vendi wendekele kuli ikeye ngwendi, "Mwene, tulongese kulombela, ngwe omo Yowano walongesele vandongisi vendi."

1 Timateo 2:1-4 Ngecivene, akulivanga, njimisindiya ngwange lambeleleni, lombeleni, kwihula, kulomba na kukandeleta vanapande kuvyana kuli Njambi ali vanu voshe, 2 na ali vimyene na ali voshe vaje valinakushika, ngeci tuyoye mwamuvwa mu kwoloka na kasingimiko koshe kuli Njambi amo na vilinga vyavivwa. 3 Evi vinapu vyavivwa, co vivwaelelesa Njambi Muyoyesi wetu, 4uje ashaka ngeci vanu voshe vovoke nakweta kukuzivuka vushunga.

Zakaliya 3:1,2 Mu cimona cikwavo Shukulu Kalunga wanjimwesele Yoshwa Muka-kukombelela Wakama nemana ku mesho a kangelo ka Shukulu Kalunga. Co kumukulo wa Yoshwa kwemanene lalo Satana, ngeci amuvangeye. 2 Kangelo ka Shukulu Kalunga wendekele kuli Satana ngwendi, "Shukulu Kalunga akuhise, Satana! Shukulu Kalunga uje wazema Yelusalema akuhise. Munalume ou napu ngwe cimbundi cakushitula mu tuhya."

Efeso 6:12 Omwo kutwesi nakulwa na vanu embwe, oloni tulinakulwa na nzili yavivi nya minzinzime ya a mukambwila na vaka-kushwana na vaka-moko ya kushika na ava vaka-kushwana na nzili mu lisusulungu eli lya myaka ino iliko.

Efeso 6:10,11 Akukotoka, koleseniko muli Mwene na mu nzili ya vukama vwendi. 11 Zaleni vitwa vyoshe vije vyanamyana Njambi, ngeci mwase kwimana nakulwisa matumbe amavi a Liyavola.

Efeso 6:13-17 Ngecivene, zaleni vitwa nya Njambi ololo! Co omo litangwa lyalivi liketa, mukase kwimana nakulwisa uje citozi akamilwisa, co omo munalu nakweta ku shongo, mukasa kwimana mbe. 14 Ngecivene, livwaeseleni cimweja, na vushunga munalizitikavvo ngwe mwiva mu vimbunda vyeni na kulongwa ngwe ntelo \* a vinulo vyeni, 15 co ngwe viñaku ku myanja yeni, mukulivwaesela cimweja kwambulula Viñanda Vyavivwa nya kwoloka. 16 Simbu yoshe ambateni kukulaela ngwe ntelo, omwo na ikeyo mwase kuzima mikili ya tuhya ya Uje Muka-vuvi. 17 Co zaleni tepa yakwovoka, na lijwi lya Njambi ngwe moko ya mukwale ije yanamyana Munzinzime.

VaHevelu 4:12 Lijwi lya Njambi lilinakuyoya nakupanga, lyavambuka kuhiana moko ya mukwale ya vuvela kuvali. Lishalava mwoshe muje mukaliwanena mwonyo na munzinzime, na muje mukaliwanena manunga na vusoso. Likelyo liilula viyongola na vizango nya vimbunge nya vanu.

Luka 4:8 Yesu wamukumbulwile ngwendi, "Vanasoneka ngwavo, 'Ukalemesa Shukulu Kalunga Njambi yove, ikeye lika iwukapangela!' "

Efeso 6:18 Lingeni vyoshe evi mukulombela, lombeni Njambi ngeci amikwase.

Lombeleni simbu yoshe ngwe omo Munzinzime amitwamenena. Omwo a cuma eci toneni kesi mujuke, lombeleni visimbu vyoshe ali vanu va Njambi.

1 Samwele 17:45-47 Ndaviti wamukumbulwile ngwendi, "Ulinakwija kuli yange na mukwale, na likunga, na cimbuya, oloni yange njilinakwija kuli yove mu lizina lya Shukulu Kalunga Muka-nzili yoshe, Njambi ya mashwalale va Isalele uje unashaula. 46 Ku litangwa lya lelo vene, Shukulu Kalunga akakukundika mu livoko lyange, co njikakutsiya nakutapa mutwe wove, njikana mivila ya mashwalale va vaFilisitiya ku tuzila na ku tusitu. Co lifuti lyoshe likazivuka ngeci Njambi ali mu Isalele, 47 co munu na munu uje ali kuno akazivuka ngwendi Shukulu Kalunga kesi kulwa na mikwale nambe na makunga mukwamena vanu vendi. Omwo Shukulu Kalunga muka-kuhyana vinzita, co ikeye akamikundika mu mavoko etu."

Luka 10:17-20 Co vaje vanalume makumi atanu na avali na vanu vavali velukile lalo nakujolela kwakama. Vendekele ngwavo, "Mwene, nameme minzinzime yakujwala yatwononokele omwo twaishikile mu lizina lyove!" 18 Yesu wavakumbulwile ngwendi, "Njamwene Satana awa kutunda mwilu ngwe muhyato. 19 Tolilileni! Njamwene moko ngeci mukalyatangele manyoka na manyewe, nakuhyana nzili yoshe ya Citozi, co nacimo cai cikamivulumuna. 20 Kesi mujolele omwo minzinzime yakujwala imyononoka embwe, oloni joleleni omwo mazina eni vanawasoneka mwilu."

2 Kolinte 10:3-5 Mwa vushunga vene tulinakuyoyela mu kaye kano vene, oloni kesi ngwe tulinakulwa ngwe ku futisi ya kano kaye embwe. 4 Vitwa vije tulinakupangesa mukulwa kwetu kesi ngwe vitwa vyva kano kaye, oloni vitwa vyva nzili ya Njambi, ije yasa kunyongesa vimbongi. Tulinakumanesa vimata vyva makuli, 5 tulinakutundisa kulyalesa kwashe kuje kwakutanukisa kuje kulinakulwisa mana a Njambi, tulinakutundisa viyongola vyoshe nakuvyaka ku vundungo ngeci vyondonoke kuli Kilistu.

Mateo 16:19 Njikakwana masapi a Vumwene vwa mwilu, co nkala cuma ciwukakuta ano asi, na mwilu vakacikuta lalo, co nkala cuma ciwukazitula ano asi, na mwilu vakacizitula lalo."

2 Timateo 1:7 Omwo Njambi katwanene munzinzime wa lyova, oloni Munzinzime wendi natushulisa na nzili na cizemo nakulinyunga.

Mateo 12:28,29 Kesi Mbelezembulu ikeye akanjana nzili yakutundisa minzinzime yakujwala embwe, oloni Munzinzime wa Njambi ikeye njikatundisa nendi minzinzime yakujwala, muzivuke ngeci Vumwene vwa Njambi vunete kuli yeni vene. 29 "Naumo wai munu asa kukovela mu njuvo ya muka-nzili nakupukula vufuko vwendi, kuvanga alivange kukuta uje muka-nzili, asinoni akapukula vyva mu njuvo yendi.

Efeso 1:13 Ngecivene, neni lalo mwapwile mu vanu va Njambi omo mwazivile lijwi lya vushunga, Viñanda Vyaviwa vije vyaminenele kwovoka. Mwakulaelele muli Kilistu, co Njambi namyaka cizivukiso cakupwa muvendi akumyana Munzinzime Wakujela uje yamikulaesele.

Vilinga vya Miluwa 19:6 Paulu wakambekele mavoko endi ali vakevo, co Munzinzime Wakujela wezile ali vakevo, vendekele mu vindaka vyeka, co lalo vambulwile muzimbu wa Njambi.

Mako 16:15-18 Co wendekele kuli vakevo ngwendi, "Yeni ku mafuti oshe a ano a kaye nakwambulula Viñanda Vyavivwa kuli vanu voshe. 16 Woshe uje akulaela nakumumbwitika akovoka, oloni woshe uje kakulaela vakamuhisa. 17 Co vaka-kukulaela vakavana nzili yakulinga vizivukiso, co vakatundisa minzinzime yakujwala mu lizina lyange, vakendeka vindaka vyaviha, 18 Vakakwata manyoka, co nambe nga vakanwa vyuma vya vushungu, kuvikavavulumuna, vakakambeka mavoko avo ali vaka-kuvinja, co vakenduka."

1 Yowano 1:9 Oloni nga tulitavela vivi vyetu kuli Njambi, co Ikeye anyunga cikulaeso cendi nakulinga vije vya vushunga, ikeye akatusambesa ku vivi vyetu nakutujelesa ku vilinga vyetu vyoshe vyavivi.

Kutuuka 20:5 Kesi mukatsikamene tumponya, nambe kutulemesa, omwo yange Kalunga Njambi yeni, njapwa Njambi wa lifuwa. Co njikahisa vaje vanjizinda na vatekulwila vavo kutwala ku cisemwa camucitatu neci camuciwana.

Myaso 109:17 Wasingle vakwavo, co ikeye lalo apwe wakusinga! Kavezikisile vakwavo, co ikeye kesi vamuvezikise lalo!

Maako 16:16 Co ikeye watwaleleo kumwihozola a litangwa na litangwa. Co wajukile manene ali uje munakazi ngwe kushaka kutsa vene,

Efeso 4:26 Nga muluvala, kesi mutave kuluvala kweni kumitwale ku vuvi, co kesi mutokese litangwa mukuluvala lika embwe.

Loma 14:12 Ngecivene, yetu voshe, munu na munu akendeka vyendi vavenya ku mesho a Njambi.

1 Yowano 2:23 Omwo voshe vaje vavyana Mwana vavyana lalo Ishe, vaje vatambula Mwana vali na Ishe lalo.

Yowano 14:6 Yesu wamukumbulwile ngwendi, "Yange ngila, na vushunga, na mwonyo, naumo wai aya kuli Tate oloni kuvanga ali yange.

Mateo 11:28-30 "Ijeni kuli yange, yeni voshe munajuka nakwambata vyakulema, co njikamihwimisa. 29 Lilemekeni mandauluwa yange, co lilongesen kuli yange, omwo yange njimukalyovwa-ovwa na kulikeesa mu mbunge, co mukawana kuhwima ku myonyo yeni. 30 Omwo mandauluwa yange yayasi, na citele cange cacehu."

2 Kolinte 6:2 Tolilileni vika Njambi alinakwendeka ngwendi, "Njamitolililile mu simbu yange yaivwa, njamikwasele mu litangwa lyakwovoka." Kengeni, eyi ikeyo simbu yaivwa, kengeni, lelo likelyo vene litangwa lyakwovoka!

Loma 10:13 Omwo ngwe visoneka vyendeka ngwavyo, "Woshe atambeka a lizina lya Mwene akovoka."